

ZAKLJUČAK
o odbacivanju Prijave koncentracije privrednog subjekta Nestro Petrol a.d. Banja Luka,
Bosna i Hercegovina

Sarajevo
februar, 2012.

Broj: 03-26-1-024-3-II/12
Sarajevo, 13.02.2013. godine

U skladu sa članom 25. stav (1) tačka e), a na osnovu člana 42. stav (2), u vezi s čl.12., 14. i 16. Zakona o konkurenciji («Službeni glasnik BiH», br. 48/05, 76/07 i 80/09), rješavajući po Prijavi koncentracije privrednog subjekta Dioničko društvo za promet nafte, naftnih derivata i prirodnog gasa „Nestro Petrol“ Banja Luka, Kralja Alfonsa XIII broj 9, 78000 Banja Luka, Bosna i Hercegovina, zaprimljenoj dana 24.12.2012. godine pod brojem: 03-26-1-024-II/12, Konkurencijsko vijeće, na 52. (pedesetdrugoj) sjednici održanoj dana 13.02.2013.godine, donijelo je

ZAKLJUČAK

1. Odbacuje se Prijava koncentracije privrednog subjekta Dioničko društvo za promet nafte, naftnih derivata i prirodnog gasa Nestro Petrol Banja Luka, Kralja Alfonsa XIII broj 9, 78000 Banja Luka, Bosna i Hercegovina, radi nepostojanja obaveze prijave koncentracije, u smislu člana 14. Zakona o konkurenciji.
2. Ovaj Zaključak bit će objavljen u «Službenom glasniku BiH», službenim glasilima entiteta i Brčko Distrikta Bosne i Hercegovine.

O b r a z l o ž e n j e

Konkurencijsko vijeće je dana 24.12.2012. godine pod brojem 03-26-1-024-II/12, zaprimilo Prijavu koncentracije (u daljem tekstu: Prijava), podnesenu od strane privrednog subjekta Nestro Petrol a.d. Banja Luka, Kralja Alfonsa XIII broj 9, 78000 Banja Luka (u daljem tekstu: Podnosilac prijave ili Nestro Petrol), kojom namjerava kupiti nekretninu - benzinsku pumpu u Mostaru, Rodoč, u vlasništvu fizičkog lica Nike Dodiga i steći isključivu kontrolu nad istom.

Uvidom u podnesenu Prijavu utvrđeno je da je ista uredna i kompletna, u smislu člana 30. stav (1) Zakona o konkurenciji (u daljem tekstu: Zakon) i Odluke o načinu podnošenja prijave i kriterijima za ocjenu koncentracija privrednih subjekta («Službeni glasnik BiH», broj 34/10), te je Konkurencijsko vijeće, u skladu sa članom 30. stav (3) Zakona, dana 04.02.2013. godine Podnosiocu prijave izdalo Potvrdu broj: 03-26-1-024-1-II/12 o prijemu uredne i kompletne Prijave.

Podnosilac prijave je naveo, u smislu člana 30. stav (2) Zakona, da ne namjerava podnijeti zahtjev za ocjenu namjeravane koncentracije drugim nadležnim tijelima za konkurenciju van granica Bosne i Hercegovine s obzirom da učesnici koncentracije posluju isključivo na teritoriji Bosne i Hercegovine.

Konkurencijsko vijeće je utvrdilo da je Prijava podnesena u skladu sa članom 16. stav (2) Zakona, budući da ista sadrži dokaze o namjeri za koncentracijom (Pismo namjere potpisano od učesnika koncentracije).

1. Učesnici u postupku

Učesnici u postupku su privredni subjekt „Nestro Petrol“ a.d. Banja Luka, Kralja Alfonsa XIII broj 9, 78000 Banja Luka i Benzinska pumpa, Rodoč, 88000 Mostar u vlasništvu fizičkog lica Nike Dodiga (..)**¹.

1.1. Privredni subjekt Nestro Petrol a.d. Banja Luka

Privredni subjekt Dioničko društvo za promet nafte, naftnih derivata i prirodnog plina “Nestro Petrol” Banja Luka, Kralja Alfonsa XIII br. 9, Banja Luka, je prema izvodu iz sudskog registra broj: Reg-Z-I-1541/12 od 23.10.2012.godine, Okružnog privrednog suda u Banjoj Luci, registrovan u sudskom registru pod brojem MBS: 1-10073-00. Osnovna registrovana djelatnost privrednog subjekta “Nestro Petrol” je trgovina na malo motornim gorivima i mazivima i distribucija i prodaja plinovitih goriva distributivnom mrežom.

Većinski vlasnik privrednog subjekta “Nestro Petrol” je privredni subjekt Otvoreno dioničko društvo NeftegazInKor, Kalanchovskasa 11, Build 2, Moskva, Ruska Federacija sa 80,0031% vlasničkog udjela, čiji je opet većinski vlasnik od 95% akcija, ruska državna kompanija “Zarubežneft” o.a.d. Moskva.

Privredni subjekt “Nestro Petrol” ima (..)**% udjela u osnovnom kapitalu društva registrovanog za trgovinu naftom i naftnim derivatima “Nestro Sava” d.o.o. Zadar, Republika Hrvatska, dok na području Bosne i Hercegovine nema udjela u osnovnom kapitalu drugih privrednih subjekata.

Na tržištu Bosne i Hercegovine “Nestro Petrol” je u 2011. godini djelovao u maloprodaji naftnih derivata kroz ukupno 88 benzinskih pumpi, od toga u Republici Srpskoj 78, u Federaciji Bosne i Hercegovine 8, i u Brčko Distriktu 2 benzinske pumpe. Pumpe na teritoriji Federacije BiH su u zakupu, a sve ostale pumpe su u vlasništvu ovog privrednog subjekta.

Prema procjeni Podnosioca prijave na tržištu Bosne i Heregovine privredni subjekt “Nestro Petrol” ima trenutno udio od 7,49% u ukupnom broju benzinskih pumpi, obzirom da na 83 pumpe trenutno obavlja djelatnost, a nakon provođenja predmetne koncentracije ovaj udio će se neznatno povećati i iznositi 7,58%.

1.2. Benzinska pumpa Rodoč Mostar

Prema podacima iz Prijave, benzinska pumpa Rodoč Mostar, predmet koncentracije je u vlasništvu fizičkog lica Nike Dodiga (..)**².

Na osnovu ugovora o zakupu, djelatnost trgovine na malo motornim gorivima i mazivima na predmetnoj benzinskoj pumpi trenutno obavlja privredno društvo „Circle International“ d.o.o. Međugorje, Podružnica Mostar, Općina Jugozapad, Rodoč bb, a čiji je osnivač fizičko lice Niko Dodig, po osnovu rješenja službe društvenih djelatnosti i gospodarstva, Gradska općina Mostar-jugozapad, Grad Mostar broj:01-IV-4-22-130/03.

2. Pravni osnov i oblik koncentracije

Pravni osnov namjeravane koncentracije je Pismo namjere, potpisano dana 10.12.2012. godine u Banja Luci, između fizičkog lica Nike Dodiga kao prodavca i privrednog subjekta “Nestro Petrol”

¹(..)** podaci predstavljaju poslovnu tajnu u smislu člana 38. Zakona o konkurenciji

²(..)** podaci predstavljaju poslovnu tajnu u smislu člana 38. Zakona o konkurenciji

kao kupca. Pismom namjere se izražava namjera kupovine tj. prodaje benzinske pumpe u vlasništvu fizičkog lica Nike Dodiga, upisane u zemljišnoknjižni uložak broj: 17 LO SP RODOČ, 88000 Mostar, te sklapanje kupoprodajnog ugovora nakon donošenja rješenja Konkurencijskog vijeća o predmetnoj koncentraciji.

Pravni oblik koncentracije je stjecanje kontrole jednog privrednog subjekata nad drugim privrednim subjektom kupovinom većine akcija ili udjela u osnovnom kapitalu, u smislu člana 12. stav (1) tačka b) pod 1) Zakona.

3. Obaveza prijave koncentracije

Obaveza prijave koncentracije privrednih subjekata, u smislu člana 14. stav (1) tačke a) i b) Zakona, postoji ako ukupni godišnji prihodi učesnika koncentracije ostvareni prodajom roba i/ili usluga na svjetskom tržištu iznose 100.000.000,00 KM, po završnom računu u godini koja je prethodila predmetnoj koncentraciji, i da ukupan prihod svakog od najmanje dva privredna subjekta učesnika koncentracije ostvaren prodajom roba i/ili usluga na tržištu Bosne i Hercegovine iznosi najmanje 8.000.000,00 KM, ili ako je zajedničko tržišno učešće učesnika koncentracije na relevantnom tržištu veće od 40,0%.

Ukupni ostvareni godišnji prihodi privrednih subjekata učesnika predmetne koncentracije na dan 31.12.2011. godine iznosili su:

Tabela 1.

Učesnici:	BiH
NESTO PETROL	(..)**KM
Benzinska pumpa Rodoč Mostar	*(..)**KM

Izvor: podaci iz Prijave

* prihod privrednog subjekta „Circle International“, zakupca koji trenutno obavlja djelatnost na predmetnoj benzinskoj pumpi

Konkurencijsko vijeće je utvrdilo (Tabela 1.) da privredni subjekt „Nestro Petrol“ i benzinska pumpa Rodoč Mostar, nisu ostvarili ukupan prihod od po 8 mil. KM, te ne podliježu obavezi prijave koncentracije.

4. Relevantno tržište koncentracije

Relevantno tržište koncentracije, u smislu člana 3. Zakona, te čl. 4. i 5. Odluke o utvrđivanju relevantnog tržišta, čini tržište određenih proizvoda/usluga koje su predmet obavljanja djelatnosti na određenom geografskom tržištu.

Članom 4. Odluke o utvrđivanju relevantnog tržišta, relevantno tržište proizvoda obuhvata sve proizvode i/ili usluge koje potrošači i/ili korisnici smatraju međusobno zamjenjivim, pod prihvatljivim uslovima, imajući u vidu posebno njihove bitne karakteristike, kvalitet, uobičajenu namjenu, način upotrebe, uslove prodaje i cijene.

Prema članu 5. Odluke o utvrđivanju relevantnog tržišta, relevantno tržište u geografskom smislu obuhvata cjelokupnu ili dio teritorije Bosne i Hercegovine na kojem privredni subjekt djeluje u prodaji i/ili kupovini relevantnog proizvoda pod jednakim ili dovoljno ujednačenim uslovima i koji to tržište bitno razlikuje od uslova tržišne konkurencije na susjednim geografskim tržištima.

Na osnovu navedenoga, kao relevantno tržište proizvoda određena je trgovina na malo motornim gorivima i mazivima i distribucija i prodaja plinovitih goriva distributivnom mrežom, dok je za relevantno tržište u geografskom smislu određena teritorija Bosne i Hercegovine.

5. Analiza relevantnog tržišta

Tržišni udjeli učesnika koncentracije i njihovih konkurenata određeni prema broju benzinskih pumpi na relevantnom tržištu u 2011. godini su slijedeći:

Tabela 2.

Red. br.	Naziv privrednog subjekta	Broj benzinskih pumpi	Tržišni udio %
01.	Energopetrol d.d. Sarajevo	65	(..)** ³
02.	HOLDINA d.o.o. Sarajevo	45	(..)**
03.	Petrol BiH Oil Co d.o.o.Sarajevo	37	(..)**
04.	NIS PETROL d.o.o. Banja Luka*	34	(..)**
05.	Nešković d.o.o. Bijeljina	15	(..)**
06.	Krajina Petrol a.d. Banja Luka	14	(..)**
07.	Hifa Oil d.o.o. Tešanj	14	(..)**
08.	Nestro Petrol a.d. Banja Luka	88	(..)**
	Ostali	796	(..)**
	Ukupno (04+08)	122	(..)**
	Ukupno:	1108	100,00

Izvor: Podaci iz Prijave i podaci Konkurencijskog vijeća

* NIS PETROL BiH je posredno u vlasništvu privrednog subjekta Gasprom, čiji je većinski vlasnik Ruska Federacija.

Prema podacima (Tabele 2.) privredni subjekt „Nestro Petrol“ je u 2011. godini na relevantnom tržištu imao tržišni udio od (..)** % s poslovanjem na 88 benzinskih pumpi.

6. Ocjena predmetne prijave

Analizom navedenih podataka utvrđeno je da učesnici predmetne koncentracije ne ispunjavaju uslove iz člana 14. stav (1) tačka b) Zakona, jer ukupan prihod benzinske pumpe Radoč Mostar ostvaren prodajom roba i/ili usluga na tržištu Bosne i Hercegovine iznosi manje od 8.000.000,00 KM (Tabela 1.), a zajednički tržišni udio učesnika koncentracije na relevantnom tržištu nije veći od 40,0%.

Na osnovu naprijed navedenog, utvrđeno je da privredni subjekt „Nestro Petrol“ nije bio obavezan podnijeti prijavu koncentracije.

Slijedom navedenog, Konkurencijsko vijeće je odlučilo kao u dispozitivu ovog Zaključka.

7. Administrativna taksa

Podnosilac prijave na ovaj Zaključak, u skladu sa članom 2. tarifni broj 108. tačka c) Odluke o administrativnim taksama u vezi procesnih radnji pred Konkurencijskim vijećem («Službeni glasnik BiH», br. 30/06 i 18/11) je dužan platiti administrativnu taksu u ukupnom iznosu od 1.000,00 KM, u korist Budžeta institucija Bosne i Hercegovine.

³(..)** podaci predstavljaju poslovnu tajnu u smislu člana 38. Zakona o konkurenciji

8. Pouka o pravnom lijeku

Protiv ovog Zaključka nije dozvoljena žalba.

Nezadovoljna strana može pokrenuti upravni spor pred Sudom Bosne i Hercegovine u roku od 30 dana od dana prijema, odnosno objavljivanja ovog Zaključka.

Predsjednik

Gordana Živković